

清末民初文獻叢刊

國朝柔遠記

(下冊)

〔清〕王之春 輯



朝華出版社
BLOSSOM PUBLISHERS

清末民初文獻叢刊

國朝柔遠記

(下冊)

〔清〕王之春
輯


朝華出版社
CHUNHUA PRESS

國朝柔遠記卷九

臣 彭玉麟恭定

臣 王之春敬編

辛丑 道光二十一年

春正月琦善以香港許英

粵東時已許償煙價銀七百萬圓而英義律索香港甚力琦善慮虎門失事許之而未敢入奏乃歸浙江英俘易定海義律度香港未可驟得先遣人赴浙繳還定海續請獻出沙角大角礮臺以易之琦善乃以出查礮位爲辭陰與義律訂期會於蓮花城義律出所定貿易章程並給予香港全島如澳門故事皆私許之

琦善伊里布罷

時義律繳還定海伊里布在浙接粵東咨文遂以收復定海聞上諭伊里布不遵諭旨惟知順從琦善屢次奏報始以兵燬未集藉詞緩攻繼以接得繳還定海之札卽信以爲眞殊非初命赴浙剿辦之意仍令折回本任時上已知琦善不足任遂命宗室奕山爲靖逆將軍尚書隆文湖南提督楊芳爲參贊大臣赴粵剿辦琦善罷

暴英人罪

先義律因琦善許給香港請用關防爲據琦善未敢遽從但屬其安靜守候既咨伊里布以收復定海省釋囚

俘遂據義律來文附奏

上大怒奉

詔覽奏曷勝

憤懣不料琦善怯懦無能一至於此該夷兩次在浙江
粵東肆逆攻占縣城礮臺傷我鎮將大員荼毒生民驚
擾郡邑大逆不道覆載難容無論繳還定海獻出礮臺
之語不足深信即使真能退地亦只復我疆土其被戕
之官兵罹害之民人切齒同仇神人共憤若不痛加剿
洗何以伸天討而示國威奕山隆文兼程前進迅卽馳
赴廣東整我兵旅殲茲醜類務將首從各犯通夷漢奸
檻送京師盡法處治至琦善身膺重寄不能聲明大義
拒絕要求竟甘受其欺侮已出情理之外且屢奉諭旨
不准收受夷書膽敢附摺呈遞代爲懇求是何居心且

據稱同城之將軍都統巡撫學政及司道府縣均經會商何以摺內阿精阿怡良等並未會銜所奏顯有不實琦善著革去大學士拔去花翎仍交部嚴加議處

籍琦善家

時義律以香港業經琦善允給遽諭居民以香港爲英屬埠又照會我大鵬營副將令將營汛撤回粵撫怡良以聞略言自琦善到粵以後如何辦理未經知會到臣忽外間傳說義律已在香港出有僞示逼令該處民人歸順彼國等語方謂傳聞未確盡惑人心隨據水師提督轉據副將稟鈔僞示前來臣不勝駭異惟大西洋自前明寄居香山縣屬之澳門相沿已久均歸中國之同

知縣丞管轄而議者猶以爲非計今該夷竟敢脅 天朝士民占踞全島該處去虎門甚近片帆可到沿海各州縣勢必刻刻防閑且此後內地犯法之徒必以此爲藏納之藪是地方旣因之不靖而法律亦有所不行更恐犬羊之性反復無常一有要求不遂必仍非禮相向雖欲追悔從前其何可及伏思 聖慮周詳無遠不

照何待臣鯁鯁過計但海疆要地外夷公然主掌並敢以 天朝百姓稱爲英國之民臣實不勝憤憾第一切駕馭機宜臣無從悉其顛末惟於上年十二月二十八日欽奉 諭旨調集兵丁預備進剿並令琦善同林則徐鄧廷楨妥爲辦理均經宣示臣等晤見時亦請添募

兵勇以壯聲威固守虎門礮臺防堵入省要隘今英夷窺伺多端實有措手莫及之勢現既見有夷文僞示不敢緘默謹照錄以聞奉 上諭香港地方緊要前經

琦善奏明如或給予必至屯兵聚糧建臺設礮久之覬覦廣東流弊不可勝言旋又奏請准其在廣東通商並給予香港泊舟寄住前後自相矛盾已出情理之外況此時並未奉旨允行何以該督卽令其公然占踞怡良所奏覽之曷勝憤憾朕君臨天下尺土一民莫非國家所有琦善擅予香港擅准通商膽敢乞朕格外施恩且伊被人恐嚇奏報粵省情形妄稱地理無要可扼軍器無利可恃兵力不堅民情不固摘舉數端危言要挾不

知是何肺腑如此辜恩誤國實屬喪盡天良琦善著卽革職拏問所有家產卽行查抄入官初琦善之陛辭也面諭以英夷但求通商則已如要挾無厭可一面羈縻一面奏請調兵未合其撤防專款也及英人攻陷礮臺上震怒有煙價一毫不許土地一寸不給之

旨并調四川貴州湖南江西兵赴剿命林則徐鄧廷楨隨同辦理然琦善不與則徐廷楨議事又不增兵爲備時將軍奕山參贊楊芳隆文已在途次廷寄令兼程赴粵而琦善仍以定海收復撫事可成績奏香港地勢及現在籌辦情形上恐奕山等到粵復踵權宜請撫故輟將琦善前後摺奏及硃批交將軍等閱看

復奉 廷寄言英夷種種不法殊堪髮指前有旨令楊芳先行赴粵會防並令奕山等兼程前進計已接奉遵行該將軍等到粵後務卽會集各路官兵一意進剿不可存一通商之見稍涉游移更不可因有繳還定海之事少加寬縱又密飭將軍等訪查當日琦善與義律屢次晤面談論香港之事彼時有無官員在旁該夷目與琦善有無私相餽送之事逐一查奏

以兩江總督裕謙爲欽差大臣赴浙視師討英

初裕謙代伊里布任兩江總督聞伊里布在浙逗留不敢進兵心弗善也至是伊里布回任 上命裕謙爲

欽差大臣馳赴浙江會提督余步雲迅剿裕謙始專任

浙事意謂犬羊之性非大加懲創無以善後遂上書主
剿並以義律心懷叵測繳還定海之說恐售其欺請
飭壽春鎮總兵王錫朋統各鎮官兵仍行前進奉

上諭所奏極是逆夷攻踞定海之後姦淫搶掠荼毒生
靈凡我士民志切同仇人思敵愾裕謙此次赴浙以順
討逆以主逐客以眾擊寡必當一鼓作氣聚而殲旃朕
伫望該大臣迅奏膚功懋膺上賞時定海鎮海等處尚
有英船四出游奕裕謙遣兵節次焚剿並誅其酋目一
人初英將踞定海虐使定民用法嚴酷殺人者先以刀
割裂其皮納入水銀周身灌注活剝而懸焉裕謙既獲
其酋亦令如法誅之又英人之死於定海令掘其尸焚

國朝文獻通考卷之九
三
之通衢以洩定民之憤事聞於粵粵東撫事方定英人
又以報復爲詞以圖犯浙

春二月英人寇虎門水師提督關天培死之

時義律聞大兵將至所請必不行謀先發初六日以火
輪兵船直抵虎門提督關天培守靖遠礮臺礮中英舟
一有頃英船連檣而進我軍眾寡不敵紛紛潰散天培
中槍自刎礮臺陷威遠橫檔各礮臺聞警亦潰總兵李
廷鈺副將劉大忠皆敗走虎門陷各隘所列大礮三百
餘并林則徐前購西洋礮二百餘門皆爲敵有英師乘
勝直薄烏涌湖南兵千餘初至倉卒出禦粵兵退湘兵
且戰且走阻水溺死者半總兵祥福拒戰不克與麾下

二將赴敵死之烏涌去省六十里城中大震十三日參贊楊芳抵粵時各路官兵未集而虎門內外舟師悉被燬楊芳議以堵爲剿使總兵段永福率千兵扼東勝寺陸路總兵長春以千兵扼鳳凰岡水路亦僅掘濠築壘未沈船下樁獵得及二沙尾稍狹雖堵塞而無兵礮守禦英人初驚楊芳宿將威名又不悉內河形勢未敢深入而漢奸盡探虛實以報二十四日英船將闖入省河經鳳凰岡官兵擊退倏潮長南風大起英人又增兵船杉板三十餘艘乘風擁至官兵轟擊英船恃其堅厚冒死深入飛礮火箭並力注攻楊芳懼蹈虎門覆轍復議羈縻

美利堅爲英人請款

時英人雖扼險要然見朝廷赫然怒琦善鑠逮恐林則徐起用我軍一振和議永絕且洋船兵費浩大亟欲通商以裕餉又初停止英人貿易時迭經上諭仍准西洋恭順之各國照常通商及英人犯順各國商船俱阻外洋不得入黃埔各國亦皆咎之及虎門烏涌潰陷於是美利堅法蘭西諸國貨船隨英船後進口適鳳凰岡官兵與英人相持美利堅領事赴營請進埔開艙兼爲英人緩頰謂英人既繳還定海仍不敢更有他求惟通商乃天朝二百年來恩例懇仍循舊制並呈出義律筆據有不討別情惟求照常貿易如帶違禁貨物

卽將貨船入官之文又言英之商人并未隨同滋事若該貨船入口藉可制服師船時定海師船亦至粵舢舨相望徧樹出賣鴉片之幟楊芳見敵入堂奧守具皆乏而煙價香港皆不索亦欲姑藉此緩兵以退敵收險遂與巡撫怡良聯銜奏請 上以其復踵權宜請撫故轍 嚴旨切責不許

三月 詔林則徐會辦浙江軍務

時靖逆將軍奕山參贊隆文及總督祁項並抵廣州奕山問計於林則徐則徐言寇勢已深新城卑薄無險可守宜遣人計誘英船退至獵得大黃滯之外連夜下碇沈船岸上迅壘沙城守以重兵大礮爲省城外障俾彼

不能制我之命而後調集兵勇船礮以守爲戰俟風潮
皆順葦筏齊備再議乘勢火攻應出萬全奕山不能用
有 詔林則徐以四品京堂馳赴浙江會辦軍務益去
冬浙閩總督顏伯燾與浙江巡撫劉韻珂兩江總督裕
謙並有密疏陳林則徐琦善功罪至是裕謙赴浙代伊
里布故有是 命

夏四月官軍夜襲英人不克英人犯廣州城

義律聞和議未可成復索烟價及香港楊芳以攻具未
備水勇未集不欲浪戰奕山見各省兵至者萬有七千
合粵兵數萬遂聽部將之言冀倖一勝以提督張必祿
屯西礮臺出中路楊芳由泥城出右路隆文屯東礮臺

出左路以四川餘丁及祁墳所募水勇三百駕小舟攜
火箭噴筒分路而伏於朔夜突攻英船適逆風焚其二
桅船二杉板小船五英兵焚溺死者數百義律自洋館
登舟竄免并誤傷美利堅人數十英兵大集反乘順風
以攻我我兵退保入城英船入碇十三洋行前河南兵
禦之殺傷相當燬我師船三艘時總兵段永福守天字
礮臺副將岱昌參將劉大忠守泥城礮臺總兵長春守
四方礮臺義律仍投書約戰翼日英兵水陸并攻我兵
皆反走天字礮臺八千觔礮未放卽爲英兵錮以鐵釘
泥城爲佛山鎮要道岱昌大忠聞礮倉皇遁港內筏材
油薪船及水師船六十餘艘皆爲英兵及漢奸所燼遂